

Siunnersuut uunga: Pisortanit ikiorsiissutit pillugit Inatsisartut inatsisaannik aamma suliffissarsiortunut ikiorsiissutit pillugit Inatsisartut inatsisaannik allanngueq pillugu Inatsisartut inatsisaat

(Isumaginninnermut, Suliffeqarnermut Nunamullu Namminermut Naalakkersuisoq)

Saqqummiussissut

(Isumaginninnermut, Suliffeqarnermut Nunamullu Namminermut Naalakkersuisoq)

Siullermeerinnineq

Naalakkersuisut matumuuna saqqummiuppaat pisortanit ikiorsiissutit pillugit Inatsisartut inatsisaannik aamma suliffissarsiortunut ikiorsiissutit pillugit Inatsisartut inatsisaannik allanngueq pillugu Inatsisartut inatsisaat pillugu siunnersuut.

Meeqqanut tapiissutit pillugit Inatsisartut inatsisaannik allanngortitsineq pillugu Inatsisartut inatsisissaattut siunnersuut immikkoortoq 45-tut ataatsimiinnermut maannakkut ingerlanneqartumut Naalakkersuisut saqqummiuppaat.

Oqimaaqatigiinnerup allaanerusup ujartorneqarnissaa siunertaralugu Naalakkersuisut aalajangerput siunnersuut tunuartinneqassasoq tamatumalu kingorna siunnersuut iluarsagaq saqqummiuniarlugu.

Tamannali ima kinguneqarpoq, inuit meerallit ullumikkut pisortanit ikiorsiissutinik pisartagaqartut, pisortanit ikiorsiissutit aamma suliffissarsiortunut ikiorsiissutit pillugit inatsisit nutaat ulloq 1. juli atuutilerpata, isertitaat malunnaatilimmik appassasut, naliliineq tunngavigalugu ikiorsiissuteqarnermut ilaasoq meeqqanut tapit tunniunneqarnissaannut periarfissaq atorunnaassammatt, meeqqanullu tapiissutinik qaffasinnerusunit taarserneqarnani.

Pisortanit ikiorsiissutit aamma suliffissarsiortunut ikiorsiissutit pillugit Inatsisartut inatsisaanni nutaani ikiorsiissutit pisariillisillugit ilusiliinerup IT-mik atortulersuutinik nutaanik ineriartortitsineq peqatigalugu kommuninut allaffissornikkut sulineq oqilisaaffigissavaa.

Taamaattoq IT-mik aaqquissuussamik suliaqarneq atortussanngortinneqarnissaalu naatsorsuutigisamit pisariunerusoq.

Taamaattumik suli nalorninarpoq IT-mik atortulersuutit pisariaqartut aallartisarnerat naammannersoq.

Naalakkersuisut tamanna tunngavigalugu Inatsisartut inatsisissaattut siunnersuut manna suliaraat Inatsisartunilu Siulittaasoqarfik qinnuigalugu pisortanut ikiorsiissutit pillugit Inatsisartut inatsisissaattut aamma suliffissarsiortunut ikiorsiissutinik Inatsisartut inatsisissaattut siunnersuutip matuma kingusinaartumik nalunaarutigineqarneranut immikkut akuersissut pillugu, taamaalillutik Inatsisartut inatsisiisa atuutilersinneqarneranni ullui kinguartillugit, meeqqanut tapiissutit pillugit Inatsisartut inatsisaannik nutaamik suliaqartoqareernissaanut aamma IT-mik atortulersuutit pisariaqartut piareernissaannut.

Taamatut oqaaseqarlunga immikkoortoq Inatsisartunut suliassanngortippara.